


NGAI NAYEBI

 Tozali solo mpenza bato ya litomba kozala awa na ntongo oyo, kozala na bomoi na mokili, komona ntango monene mosusu ya Pasika. Pasika ememelaka biso ntango nyonso li—likambo moko ya nkembo, bilikia ya sika. Mpe—mpe ezali mpenza likambo monene!

2 Mpe kaka ndenge nazalaki kokota na eteni ya ndako kuna nsima na ntongo oyo, moto moko akutanaki na ngai mpe alobaki: “Ndeko Branham, oyebi be—bebé moke, to mwana moke, to moto moko, babondelaki mpo na ye na Chautauqua mbula eleki, oyo basengelaki kolongola motema na ye, mpe ba-valve ya motema to kobongisa eloko moko na yango.” Alobaki: “Bebé yango abikisamaki, mpe azali kati na ndako oyo na ntongo oyo, kutu, mpe afandi awa na ntongo oyo.” Na bongo yango ezali malamumu, tokozua longwa na yango litatoli moke ntango mosusu liboso ya kobanda liyangani mosusu oyo. Mpe tozali na biso kaka bato ya esengo.

3 Sikoyo nakosenga na ndeko Neville soki akoki kozua Likomi ya kotanga na Matai to Luka, esika moko, na ntina na lisekwa, soki botangi yango naino te. Bosili kotanga yango, ndeko? [Ndeko Neville alobi: “Te.”—N.D.E] Boye, wana tozomilengela mpo na libondeli.

4 Mpe sikoyo sima na liyangani oyo, ekozala liyangani ya kobondela mpo na babeli. Sima na liyangani oyo kosila, boye bokoki kokende kolia bilei na bino ya ntongo. Bongo, sima na yango, tokozonga lisusu na ngonga ya libwa na ndambo ya ntongo mpe kobanda liyangani mosusu. Na bongo mayangani ya kobondela mpo na babeli ekolanda yango. Na nsima mosala ya libatisi ekolanda yango.

5 Oyo ezali ntango kitoko mpo na libatisi! Oh, la la! Lisekwa! Yango nde ntina oyo tosili kobatisama, mpo Asekwaki lisusu.

6 Nazoyeba lisusu liboso tozwa esika na biso ya kobatisa awa, nazalaká komema bango na ebale awa na nsé, na ntongo ntongo, ba-ntongo ya malili makasi mpenza, mpe kobatisa bato yango kuna na nsé, na ebale. Ezali na eloko moko na ntina na yango ete, ezalaka kaka ntango moko ya búlee. Pasika, ezalaka ntango monene.

Nazalaki kotala Ndeko Pat Tyler oyo afandi awa.

7 Nazalaki kosolola na moto moko lobi na mpokwa, ete, liyangani na biso ya suka na Oklahoma, namekaki ko, nazomeka sikoyo (mpe nakopesa liyebisi oyo) kotia yango pembeni kino Nzambe akobenga ngai kosala yango, lotomo na ngai ya kala ya

bososoli makanisi ya mitena, mpo nakanisi (kobanda) ezali lo—lotomo ya sika nde ezali koya.

⁸ Mpokwa mosusu wana, moto moko te ayebaki eloko moko na ntina na yango, namekaki yango likolo na mwana moko oyo azalaki koya na etumbelo, abotamaki na miso ekufá, bebe; mpe azalaki mobimba na miso ekufá, mwana mobali pene na mibu zomi na motoba. Mpe kaka na ntango wana agángaki, “Ndeko Branham, nakoki komona!” Mpe wana, Pat azalaki. . . Ty- . . . azalaki ya kotelema penepene, kaka pembeni ya mwana mobali yango, ntango miso na ye efungwanaki mpo na mbala ya liboso na bomoi na ye mobimba. Na bongo nandimi ete bino bozali awa, ná etingia monene mpenza, ná ngai moko, nazali kotalela eloko moko, ete Nzambe ásalela biso, mpe ámema biso na mosanda mosusu koleka esika oyo tozalaki.

Tógumba mito sikoyo mpo na libondeli.

⁹ Tata na biso ya Ngolu na Likolo, wana tosili kosangana na ntongo oyo, awa na mwa losambo moke oyo na ngambo ya nzela, tozongisi matondi solo epai na Yo, mpo na nyonso oyo yango ezali mpo na biso, koleka mpenza na ntongo ya Pasika oyo. Soki Pasika ezaláká te, tolingaki kozala te na lolenge oyo tozali lelo. Pasika wana nde likambo oyo etiaki elembo na bilaka nyonso ya Nzambe. Endimisaki yango epai na biso. Nyonso oyo Ye atikálá kolaka, likambo yango nyonso ekomaki solo na Pasika. Moko na mikolo minene ya bosepeli oyo tokoki kozala na yango kati na mobu! Mpe tokosenga, Nkolo, lelo, ete Óbondisa mitema na biso wana tofandi, tozali kozela, mpe na nse na kozela na etingia mpo na Molimo Mosanto Oyo ayaki sima na Pasika, mpo na kokita likolo na mitema na biso mpe kobondisa biso, mpe kozongisa kondima na biso, kati na epimeli ya nguya monene, ete tókoka kotambola na bomoi oyo Yesu atindaki biso kotambola na yango.

¹⁰ Tozali kobondela mpo na moto moko na moko, mpe koleka mpenza mpo na baoyo bazwami kati na bipekisasi mpe bakoki kokende na mayangani esika moko te lelo. Nzambe, zala ná bango elongo. Mpe tika—tika ete Pasika oyo ézala Pasika ya solosolo mpo na bango, ete bátelema longwa na mbeto, ná bokólóngónu ya sika, oyo bango batikálá koyeba liboso te na bomoi. Kokisa yango, Nkolo.

¹¹ Tika ete motei moko na moko, mosali nyonso Ozali na ye zingazinga na mokili lelo, oyo azali kosepela ekaniseli monene oyo, tika ete bázala na kopakolama, makasi mpe nguya, mpo na komema na biyanganelo na bango (ba-mpate oyo bazali kozela) Bilei oyo Nzambe azali na yango na ebombelo mpo na libota na Ye. Kokisa yango, Nkolo. Tozali kozela eteni na biso, na komikitisa, na Nkombo na Nkolo Yesu Klisto. Amen.

¹² Nakosenga na Ndeko Neville sikoyo átanga Makomi oyo elobeli lisekwa. [Ndeko Neville alobi: “Matai 28,” mpe atangi Likomi oyo elandi—N.D.E.]

[Na suka ya sabata, lokola ebandaki kobeleva na kotana ya ntongo ya mokolo na liboso ya poso, Malia Madalena mpe Malia mosusu bayaki mpo ya kotala kunda.]

[Mpe, tala, koningana ya mabelé ezalaki makasi: mpo mwanje na Nkolo akitaki longwa na likolo, mpe ayaki mpe alongolaki libanga longwa na ekuke, mpe afandaki likolo na yango.]

[Kongenga na ye ezalaki lokola mokalikali, mpe bilamba na ye pembe lokola mbula pembe:]

[Mpo na kobanga ye bakengeli balengaki, mpe bakomaki lokola bakufi.]

[Mpe mwanje azongisaki monoko mpe alobaki na basi ete, Bobanga te: mpo nayebi ete bozali koluka Yesu, oyo abakamaki na ekulusu.]

[Azali awa te: mpo ete asili kosekwa, lokola elobaki ye. Boya, botala esika Nkolo alalaki.]

[Mpe bokende na lombangu, mpe boyebisa bayekoli na ye ete asili kosekwa longwa na bakufi; mpe, tala, azali kokende liboso na bino na Galilai; bokomona ye kuna: tala nasili koyebisa bino.]

[Balongwaki na lombangu na nkunda na somo mpe na esengo monene; mpe bakimaki kopesa bayekoli na ye nsango.]

[Mpe wana ekendeki bango koyebisa bayekoli na ye, tala, Yesu akutanaki na bango, mpe alobi na bango ete, Mbote na bino. Bongo bayaki mpe basimbaki ye na makaka, mpe basambelaki ye.]

[Na sima Yesu alobaki na bango, Bobanga te: bokende koyebisa bandeko na ngai ete bakende na Galilai, mpe kuna bakomona ngai.]

[Sikoyo wana ezalaki bango kokende, tala, bamosusu na bakengeli bayaki kati na engumba, mpe balakisaki epai na mikonzi na banganga makambo nyonso oyo esalamaki.]

[Mpe wana eyanganaki bango elongo ná mikóló, mpe basalaki likita, bapesaki basoda mosolo mingi.]

[Kolobaka ete, boloba ete, bayekoli na ye bayaki na butu mpe bayibaki ye wana ezalaki bango kolala mpongi.]

[Mpe soki likambo oyo ekomi na matoi na mokonzi ya mboka, tokondimisa ye, mpe kopesa ye kimia.]

[Na bongo bazwaki mosolo, mpe basalaki lokola elakisamelaki bango: mpe likambo oyo ezali kolobama kati na bayuda kino lelo oyo.]

[*Na bongo bayekoli zomi na moko bakendeki na Galilai, na ngomba oyo Yesu ayebisaki bango.*]

[*Mpe wana emonaki bango ye, basambelaki ye: kasi bamosusu batiaki ntembe.*]

[*Mpe Yesu ayaki mpe alobaki na bango, ete, Nguya nyonso esili kopesamela ngai na likolo mpe na mabele.*]

[*Bokende bongo, mpe bolakisa mabota nyonso, bobatisa bango na nkombo na Tata, mpe na Mwana, mpe na Molimo Mosanto:*]

[*Kolakisa bango ete batosa makambo nyonso esili ngai kolaka bino: mpe, tala, Ngai nazali elongo na bino mikolo nyonso, kino suka na ekeke. Amen. Eteni ya maloba ezangi kati na bande.*]

13 . . . bakisa mapamboli na Ye na litangi ya Liloba na Ye.

14 Sikoyo tokolinga koloba, liyebisi lisusu awa, ete mayangani, mpo na ntongo, ekokoba kino na ngonga ya libwa na ndambo ya ntongo, kaka ntango tokokóma na suka ya oyo, li . . . liyangani ya ntongo oyo sikoyo. Na boye tobengaka oyo liyangani na biso ya kobima na moi. Mpe tozali, tozali na mwa makambo minene ya koyebisa bino na ntina na—na mayangani oyo euti koleka. Mpe tolingi ete bino baoyo bozali na bokono mpe na mpasi, bino nyonso, bóya ná kondima na ntongo oyo, kondima ete Yesu oyo aseki azali kobika lelo, mpe Azali kaka motindo moko ndenge Atikálá kozala. Abongwani ata moke te.

15 Sikoyo nalingi kotanga mwa eteni ya Likomi awa, ezwami na mokapo ya 19 ya Yobo, kobanda na molongo ya 15.

Baoyo bazali kofanda kati na ndako na ngai, . . . basali na ngai, bazali kotanga ngai lokola mopaya: Nazali mouta na miso na bango.

Nabengaki mosali na ngai, mpe azongiseli ngai liloba te; nabondelaki ye na monoko na ngai.

Mpema na ngai ezali eloko ya kokamwisa epai na mwasi na ngai, atako nabondelaki mpo na ntina na bana ya mosuni na ngai mpenza.

Iyo, bilenge bana batiolaki ngai; natelemaki mpe basololaki kotemela ngai.

Baninga na ngai nyonso ya nzoto baboi ngai: mpe bango oyo ngai nalingaki batelemeli ngai.

Mikua na ngai ekangani na loposo na ngai mpe na mosuni na ngai, mpe nabiki na loposo na mino na ngai.

Boyokela ngai mawa, boyokela ngai mawa, O bino baninga na ngai; mpo ete loboko na Nzambe emami ngai.

Mpo na nini bozali konyokola ngai lokola Nzambe, mpe bozali kotonda mosuni na ngai te?

*Oh soko maloba na ngai sasaipei ekokaki kokomama!
Oh soko ekomamaki na ekomeli na mokanda!*

*Ete ékomama na ekomeli ya ebende mpe étiana likolo
na libanga mpo na libela.*

*Ngai nayebi. . . mosikoli na ngai azali na bomoi, mpe
ete akotelema na mokolo na suka likolo na mabele:*

*Mpe ata sima. . . nkusú ya loposo ekobebisa nzoto oyo,
nde na mosuni na ngai nakomona Nzambe:*

*Oyo ngai nakomona ngai moko, . . . miso na ngai
makotala, mpe ya mopaya te; atako motema na ngai
esenjwi kati na ngai.*

¹⁶ Nakolinga kozwa lokola motó ya liteya wana, ezwami kati na Yobo 19, *Ngai Nayebi*.

¹⁷ Tata ya mabota na eleko oyo azalaki mwa moke lokola biso tozali lelo. Azalaki kati na kpókosó mpenza, ndenge tobengaka yango, “mai ya komata” mpe akomaki na suka. Azalaki kofanda likolo na mabondo ya putulú mikolo mingi, mpe azalaki komeka kozwa maloba ya kobondisa ye, koluka kozwa eloko moko oyo ekokaki kopesa ye mpiko, mpe eloko moko oyo eko—ekokaki kozala libondisi epai na ye wana azalaki komona bomoi na ye kokende na kolimwa kati na ye.

¹⁸ Ya liboso, azalaki mobangé, pene na mibu ntuku libwa, mpe abetamaki na loboko na Nzambe. Sikoyo, toyebi ete Nzambe asimbaki ye ná loboko na Ye te, kasi Nzambe apesaki Satana ndingisa ya kosimba ye. Nzambe azalaka kaka na basali mpo na kosala makambo. Soki Nzambe alingi ete mabe moko ésalema, Akotika kaka Satana ásala yango. Mpe soki Alingi malamú ésalema, Azali na basali na Ye oyo Ye akotika bango básala yango.

¹⁹ Mpe Satana asimbaki Yobo na ntina moko, mpo na komeka ye, mpamba te ye ná Nzambe basilaki kobetana ntembe. Nzambe ayebisaki Satana ete, “Nazali na mosali moko na mokili, moko lokola ye azali te. Nyonso oyo Nalobaka na ye, akosala yango. Azali moto abongi be, mpe moto na sembo.”

²⁰ Mpe Satana alobaki: “Soki Okoki kaka kotika ngai názwa ye, nakosala ete átuka Yo liboso na Yo.”

²¹ Yobo, kozanga koyeba ete makambo nyonso oyo ezalaki koleka, likambo yango ememaki mpaka yango kati na bozindo ya bolozí makasi. Nzokande, na lolenge moko boye, ntango makambo nyonso esilaki kobebela ye, akobaki kobatela esika na ye kati—kati na Klisto. “Ngai nayebi ete Mosikoli na ngai azali na bomoi,” alobaki.

²² Sikoyo biso tokómaka na bisika yango. Bisó nyonso tokómaka wana. Mpe nandimi ete lelo, tosangani awa mpo na likambo moko oyo ezali na ntina moko lokola yango. Tozali biso nyonso likolo na mabondo ya putulú. Tozali na mitungisi

na biso, bisengo mpe bampassi na biso, mpe ba-ngonga na—na biso ya mabe, ná makono na biso, ba-mpasi ya mitema na biso, mpe ba-kolemba mitema na biso. Boye toyei ndenge oyo, na ntongo moko, na ntongo ya Pasika oyo, mpo na kozwa maloba ya kobondisama, ndenge Yobo azalaki koluka kozwa yango longwa na baninga na ye.

²³ Moko te na kati na bango akokaki kopesa ye libondisi moko. Likolo na mokakatano na ye, bango bazalaki kofunda ye ete azalaki mosumuki ya nkuku. Na bongo, na kati na motungisi nyonso wana, Nzambe ayaki kosunga ye.

²⁴ Yobo azalaki komitunatuna, lokola ayebaki ete, ezalaki kaka bokono na ye mpe makwanza na ye te, motungisi mpe ba-mpasi ya motema, ndenge abungisaki libota na ye mpe bozwi na ye nyonso, etikalaki kaka moke ékamata bomoi na ye, kasi azalaki mobange, ná mibu epusani mpenza, mpe ayebaki ete azalaki kokende na nkunda. Mpe, na koyebáká ete, azalaki kondima ete ezalaki na moto moko oyo asalaki ete ye áya na mokili, akokaki koya awa te na ye moko. Mpe ayebaki ete autaki na tata moko ná mama moko, kasi, ata bongo, tata yango ná mama yango basengelaki kozala na moto moko ya koyeisa bango. Mpe yango ekokaki kozonga sima kino na ebandeli, “Nani ayeisaki moto ya liboso?”

²⁵ Na bongo amitunaki likambo oyo. “Ezali likambo ya kokamwa ete ngai nazali oyo, kotambolatambola, bomoi ya likoló koleka oyo ya nyama, mpe bomoi ya likolo koleka bomoi ya moloná.” Kasi ata bongo tomoni ye koloba: “Soki nzete ekufi, ekobika lisusu. Mpe soki fo—folólo ekufi, ekobika lisusu.” Kasi alobaki: “Moto akolala, mpe akotika molimo na ye, mpe azali wapi? Bana mibali na ye bakoya kolela ye mpe komemia ye, kasi ye akomona yango te.” Mpe azalaki komituna: “Ezalaki likambo nini ete—ete Nzambe átika bomoi lokola wana ébika lisusu, lokola fololo mpe miloná, kasi moto akokoka kobika lisusu te?” Makambo oyo nyonso etungisaki ye.

²⁶ Mpe soki tokoki kozwa lilako moko longwa na nsuka ya likambo oyo na ntongo oyo. Mpe yango nde ntina oyo tozali awa. Tosila koyoka lisolo ya Pasika, mbala na mbala, mpe totángá yango na ndenge nyonso; mpe lelo, na ba-emission ya radio na bino, bokoyoka batei ndenge na ndenge etokolola na ntina na yango. Kasi oyo ngai nakanisaki, mpo na etonga moke na ngai, oyo Nkolo asili kopesa ngai, na ntongo oyo, nakolobela likambo yango na lolenge mosusu soki nakokoka, kokoma na esika ya koloba: Mpo na nini tokómaka na mitungisi oyo? Eloko nini esalaka ete makambo oyo éya? Mpo na nini Moklisto asengelaka kozala ntango nyonso na motatabano? Mpo na nini ekokaki kosala te, ete makambo nyonso étambola malamumu be mpo na Moklisto? Kasi esalemaka te, mpe toyebi yango.

²⁷ Mpe ba-ngonga mosusu tozalaka na mitungisi mingi ntango tokomaka Moklisto koleka ntango tozalaki basumuki. Ya solo, Ekomami ete: “Makambo ya mpasi mingi ekokómelaka moyengebene, nde Nzambe akobikisaka ye kati na yango nyonso.” Nzambe alakaki makambo ya mpasi mingi, biyokeli ya ndenge, mpe makambo ya kokamwa oyo ekoleka lisosoli na biso, kasi esalemaka ntango nyonso mpo na bolamu na biso. Tokoki na biso kososola yango te, mpamba te, soki tososolaki yango, boye elingaki lisusu kozala kondima te mpo na biso; tolingaki nde kotambola na lisosoli. Kasi tosalaka yango, tozalaka na yango, mpe tondimaka na nzela ya kondima, Liloba na Ye, ete ekosala eloko moko ya malamumu mpo na biso. Soki tokokaki kosimba likambo yango lelo, na—na ntongo oyo. Soki tokokaki kosimba ete mitungisi na biso nyonso. . . Mpe ezali na moko te kati na biso oyo azangi kozwa yango. Mpe soki tokokaki kososola ete makambo yango ezalaka mpo na bolamu na biso!

²⁸ Ekomami, kati na moko na Makomi yango na Biblia, ete: “Mimekano oyo ezali koya likolo na biso, ezali na motuya monene epai na biso koleka wólo yango moko, mpamba te Nzambe nde azali kopesa biso mimekano oyo.” Sima na biso kokóma baoyo ya Ye, liyamboli na biso mpe libatishi na biso, mpe elaka na biso ya kotambola na bomoi mpo na Ye, na bongo mommekano nyonso oyo eyélaka biso ezali mpo na kobongisa biso be mpo na nkembo na Ye. Ezali mpo na komema biso na esika oyo Nzambe akoki komikomisa Ye moko solo mpenza epai na biso koleka ndenge Ye azalaki liboso mommekano éya.

²⁹ Nalingi komibakisa elongo ná Yobo na ntongo oyo, mpo na koloba ete nasili kobika ntango molai mingi mpo na koyeba ete oyo wana ezali solo. Nasilá komona yango kati na bomoi na ngai moko, ete ntango nyonso likambo moko ya monene ezali kokóma, oyo nakoki kozunguluka yango te, to koleka na nse na yango to likolo na yango, Nzambe afungolaka nzela, mpe abimaka na nkembo. Namitunaka ndenge nini ngolu na Ye esalaka yango mpenza, kasi Asalaka yango.

³⁰ Mpe bómikanisela, kati na makambo nyonso oyo, Satana amekaka kokómisa biso motema likolo likolo, mpe kobulunganisa biso, komema biso kokanisa: “Oo, mpo na nini likambo *oyo* esalemi? Mpo na nini nakokaki te kozala ndenge *oyo*?”

³¹ Eleki mwa mikolo ntango nabimaki na esika moko ya kitoko koleka, mpe na bozenga koleka oyo natikálá komona kati na bomoi na ngai mobimba, ezalaki ndako monene ya ndeko na biso, Oral Roberts. Ntango namonaki libanga makasi wana, mpe lininisa moko te na yango esika moko, kasi ndenge yango ebongisamaki! Nasilá kozala na Hollywood mpe nasilá kozala na ba-ndako ya bakonzi, mpe nasilá kokende na bisika nyonso oyo ekokaki kozala, mpenza, na mokili mobimba, ná bomengo na yango nyonso, ndako pe bisika ya kitoko, kasi natikálá komona

eloko moko te, esika moko te, ya kokokanisa, ná yango, ata esika moko te. Ndenge mwa ba-nsinga ya aluminumu etongami na—na katikati elongo, mpe, oh, natikálá komona eloko ya kitoko bongo te kati na bomoi na ngai mobimba. Ntango nakotaki na kati kuna, mpe nazwaki maboko na ngai mpe namamáki makonzi ya kitoko wana, mpe—mpe libanga monene yango; nyonso na lolenge ya banzambe misato ya Tata, Mwana, mpe Molimo Mosanto, bo—bopapami na yango. Biloko nyonso wana! Nautaki kolongwa na oyo ya Ndeko Tommy Osborn, mpe namonaki mosala na ye monene, ya nguya kuna mpo na Nkolo.

³² Natelemaki na libanda, natalaki na sima na ndako wana, mpe nakanisaki: “Nzambe, ya solo mpenza nakomi mokosi, ya solo mpenza nakomi mobwakami, esika moko boye; mpamba te, ntomo ya mibali oyo ebimi uta na oyo ya ngai.” Mpe nakanisaki: “Nini yango? Ntango mosusu ngai nazali moto ya kotiela motema te, Nkolo, ete Okokaki kotiela ngai motema te ná eloko lokola oyo wana. Ata mwa, ndambo ya ba-dollar oyo Ozali kotika náfuta mpo na mayangani mpe makambo mosusu, sikoyo bazali komeka kotinda ngai na boloko mpo na yango. Mpe mpo na nini nazali mokosi boye, to mpo na nini nazali moto oyo bakoki kotiela ye motema te?”

Nazalaki kofanda likolo na libondo ya putulú, ndenge Yobo ya kala azalaki.

³³ Ntango natelemaki na libanda wana, nazalaki lisusu ata kokoka kokanga pema te, komona mosala ya lokumu boye mpenza; ete elenge mobali moko boye abotami na esika ya bobolá, Pantekotiste moko, ákoka kosala mpe kobimisa ndako monene mpe kitoko wana. Mpe namilobelaki: “E Nzambe, ntango mosusu nalongobani te.”

³⁴ Kaka na ntango yango mwa Mongongo moko ekitaki na bilekelo ya bitutu wana, mpe elobaki: “Kasi Ngai nazali eteni na yo.”

³⁵ Na bongo nakanisaki, “O Nkolo Nzambe, oh, tika ete yango ézala ndenge wana, na bongo, Nkolo. Na. . . mpo ete nalingaki te kozala na mayele ya kosalisa mosala monene ya motindo wana mpo na Yo. Mpe nazali mo—moto atangá te. Kasi, na ntango nyonso oyo Yo ozali eteni na ngai, Ngai nazali wa yo, mpe Yo okokamba ngai. Nakokaki komikamba te. Kasi, O Nkolo, kamba ngai!”

³⁶ Ezali ba-ngonga wana ya mokano nde epusaka biso na bazelo mosanto wana. Ezalaki kati na Biblia. Mpe bómikanisela, ata mpasi ezali monene ndenge nini, Satana akoki kozwa bomoi na yo te kino Nzambe ásilisa ná yo. Eloko moko ekoki kokómela yo te soki Nzambe apesi yango nzela te. Ezali na mabe moko te oyo ekoki koya soki Nzambe apesi yango nzela te. Ezali mpo na bolamu na yo nde Ye azali kosala yango. Tókanisa nano.

37 Kuna ntango mpela eyaki mpo na kobebisa mokili, ekokaki kobebisa Noa te. Noa akokaki kobebisama te, mpamba te Nzambe azalaki na mosala moko mpo na ye kosala.

38 Mokolo moko, kuna na ekólo moko monene na nse na boómbo moko monene, ezalaki na bana moko ya Baebele oyo toyebi lokola Sadalaka, Mesaka mpe Abede-nego. Mpe ekomaki na esika moko oyo esengelaki bazwa mokano, ete eloko moko esengelaki kosalema. Bazalaki na . . . Kondima na—na—na bango etiamaki na momekano.

39 Mpe ntango kondima na yo etiami na momekano, na boye kokwea te. Tikala kaka mpenza ná oyo yo ondimaka.

40 Mpe ntango kondima na bango etiamaki na momekano (Mpe bakotaki na ngonga ya kozwa mokano, ezalaki kaka te ete bakotaki kati na—na libondo ya putulú, kasi bakendeki kati na litumbu ya móto, kasi Satana akokaki kobebisa bango te, mpamba te mwango na Nzambe ekokisamaki naino te.), bakokaki kokota kuna na elikya oyo: “Ngai nayebi ete Mosikoli na ngai azali na bomoi!” Bakokaki kokota kuna na elikya oyo awa, “Tondimisami ete Nzambe azali na makoki ya kokangola biso longwa na litumbu ya móto oyo, kasi, ata bongo, tokogumbamela ekeko yango te.”

41 Satana akokaki kozwa bango te. Akokaki kozindisa Noa na kati ya mpela te, kino mwango na Nzambe ékoma na suka. Akokaki kozikisa bana ya Baebele te, kino mwango na Nzambe ekomaki na suka. Akokaki koboma Yobo ná makwanza mabe mpe mikakatano te, kino mwango na Nzambe ekomaki na suka. Ndenge moko mpe nkosi ekokaki kolia Danyelee te, kino mwango na Nzambe ekomaki na suka. Ndenge moko mpe kufa mpe bompaka ekokaki kokamata Abraham te, kino mwango na Nzambe ekomaki na suka.

42 Mpe ndenge moko ekoki kokamata yo te, to ekoki kokamata ngai te, kino mwango na Nzambe, na ntina na bomoi na biso, ékoma na suka. Boye, tosangani longwa wana, na kobondisama.

43 Mpe mpo na nini Nzambe atikaka mitungisi éya? Nzambe azali na bokonzi likolo na mokakatano, akangaka monoko na yango mpe asalaka ete yango étosa Ye, mpe mikakatano yango ememaka biso pene koleka na boyokani ná Nzambe.

44 Monama ezalaki te kino mpela eyaki. Kasi sima na Noa kopusama mpenza kati na motindo wana oyo ye azwamaki kati na yango, konana mikolo ntuku minei moi mpe butu, kati na mopepe makasi, mpe mwa masua yango ezalaki kotepatepa komata-kokita na kati na mai; ezalaki sima ya mpela koleka, nde amonaki monama mpo na mbala na yango ya liboso, kondimana ya elikya, kondimana ya elaka. Sima na ye koleka kati na monyoko, bongo amonaki elaka.

45 Yango nde lolenge oyo okomona elaka, sima na yo koleka kati na monyoko. Nasepelaka na liyemi yango, to nzembo:

Esengeli nde námemama na ndako na Lóla
 Likolo na mbeto ya fololo ya makambo ya pete,
 Na ntango bamosusu babundaki mpo na
 kolónza libonza
 Mpe bananaki kati na ba-mbu ya makila?

46 Bisó tose ngaka bomengo mpe kimia. Nzambe apesaka biso ya malamú koleka oyo Ye akokaki kopesa biso: mimekano mpe minyoko. Yango ezali malamú koleka bomengo mpe kimia. Bomengo na biso ezali kaka na ngambo ya ebale.

47 Ezalaki kino bana ya Baebele batindamaki na makasi kati na litumbu na móto, kati na moko na mimekano na bango ya kafukafu, kino ete bamonaki Moko na lolenge ya Mwana na Nzambe atele mi katikati na bango. Mitungisi na bango ebimisaki Mwana na Nzambe kotelema katikati na bango, kati na makala ya kopela, mpo na kopepa mosika molunge ya móto yango. Kasi esalemaki te kino ekotaki bango kati na móto nde Mobondisi wana amonanaki.

48 Ezalaki Danye le oyo akanaki na motema na ye ete akomikomisa mbindo te na makambo ya mokili, mpe atindamaki na makasi na nzela ya momékano, kotala soki akobondela epai na Nzambe to akokende na libulu ya bankosi. Kasi ezalaki sima na móto kopelísama, mpe asilaki kobwakama kati na libulu ya bankosi, nde, sima na yango, amonaki Mwanje na Nkolo atele mi na katikati na ye, kotika yango mosika, Likonzi na Moto monene yango kotelema katikati na ye ná bankosi. Mpe bankosi bakokaki kosimba ye te, mpamba te alekaki kati na mimekano, masenginya mpe mitungisi. Ayebaki ete Nzambe na ye azalaki na makoki ya kokangola ye na likambo wana.

49 Ezalaki Abraham, sima na ye komona mabelé kozanga kobimisa matiti mpe ngángé éya, mpe Lota komikabwana mpe kokende kobika na bisengo kati na mokili, ezalaki sima na ye koyoka koyimayima mpe milelo ya—ya bakengeli bibwele na ye, ná bozangi matiti mpo na bangombe na ye, kasi atikalaki na mabelé oyo Nzambe apesaki ye mpe ayebisaki ye áfanda kati na yango. Mpe lokola na eleko wana, sima na ye komekama kino motema molai na—na ye ekomaki na suka, ezalaki na eleko wana nde, ntango sima na momékano koleka, asololaki na Elohim miso na miso na nsé na nzete monene mokolo wana. Ezalaki sima na ye koyikela mimekano na ye mpiko, sima na ye koleka kati na mitungisi oyo alekaki kati na yango, nde Nzambe abimelaki ye na lolenge ya Moto; mpe afandaki wana mpe alobaki na ye ete abalaki mpe nkombo ya mwasi na ye ezalaki Sara, mpe alobaki ete ye mwasi ase kati Ye, kati na hema na sima na Ye. Ezalaki wana nde Abraham abengaki Ye “Elohim.” Ezalaki sima ya momékano mpe monyoko.

50 Oh, soki Lingomba ekokaki bobele komilamukisa Yango moko lelo, mpo na komona ete sima na mitungisi mpe mimekano,

mpe kosekama mpe kotiolama, makambo oyo Lingoma eleki kati na yango, Lingomba Pantekote, nde tozali komona Nzambe katikati na biso, kosala bilembo binene, mpe bikamwa.

Sima na mpasi mpe mitungisi ya mokolo,
Sima na nyonso koleka,
Na bongo tokomona Yesu na suka.

Akozala kozela ngai,
Yesu ya kitoko mpe solo,
Likolo ya ngwende na Ye kitoko,
Akotombela biso boyei malamuna na Ndako
Sima ya mokolo kosila.

Wana moi ezali naino, tika ete tósala mosala.

⁵¹ Bato minene nyonso oyo, oyo ekozwa eteni monene ya liyangani na biso ya ntongo, koluka kolobela likambo yango. Balekaki kati na mimekano, mpe bamonaki Nzambe. Balekaki kati na mimekano, mpe bamonaki Banje. Balekaki kati na mimekano; mpe bimoniseli, mpe bamonaki bilembo ná bikamwa, mpe nyonso wana.

⁵² Kasi, Oh, moko te kati na bango amonaki oyo Yobo amonaki. Mibali nyonso wana, sima na komona Banje, mpe komona Nzambe ná makambo oyo nyonso, batikálá komona eloko moko te ya kopesa bango elikya mosika koleka nkunda. Kasi Yobo amonaki lisekwa! Amonaki Pasika. Amonaki eloko oyo ebondisaka motema nyonso. Bongo ntango asalaki yango: “O tika ete maloba na ngai makomama na kati ya mokanda moko! O ete matiamana na ekomeli ya ebendé, kati na libanga!”

⁵³ Bomoni, yango, makambo nyonso ebalukelaki ye. Ya ye, ata basali na ye balingaki kosolola na ye te. Mwasi na ye azalaki mopaya. Ye wana afandi, likolo na libondo ya putulú, mommekano monene wana. Mpe lingomba eyei, mpe bapesi ye mokongo, mpo na mikolo nsambo. Mpe moto moko te mpo na kobondisa ye!

⁵⁴ Bongo ekokaki kosalema ete amonaki emononeli ya Pasika, ntango agangaki: “Ngai nayebi ete Mosikoli na ngai azali na bomoi, mpe na mikolo ya suka Akotelema na mabelé. Ngai nayebi! O tika ete maloba na ngai makomama na ekomeli ya ebendé, kati na libanga, ete maloba na ngai makoka kolimwa lisusu ata moke te, mpo ngai nayebi ete Mosikoli na ngai azali na bomoi! Ngai nayebi! Ngai nayebi!”

⁵⁵ Oyebi nini, Yobo? “Ngai nayebi ete Mosikoli na ngai azali na bomoi.” Bomoni yango, ezali kaka te ete Moto moko azalaki na bomoi, kasi Ye azalaki Mosikoli mpo na Yobo!

⁵⁶ Oh, Nkombo na Nkolo epambolama! Nazali mpenza na esengo ete nazali eteni ya Pasika, ete nazali eteni ya lisekwa yango! Mpe biso tozali eteni na yango na ntongo oyo, mpo ete na kati na biso nde Bomoi ya lisekwa yango efandaka (elingi koloba, mosangani) oyo ememaki Pasika. “Ngai nayebi ete Mosikoli na

ngai. . .” Oyebi nini? Nazobanzabanza likolo na yango te; tozali na kobanzabanza mingi mpenza lelo. “Ngai nayebi ete mosikoli na ngai azali na bomoi!” Iyo, mesie.

⁵⁷ Sikoyo Ye azalaki nini? Soki azalaki, Azalaki Mosikoli mpo na Yobo. “Na ngai,” bo-mei, *na ngai*, “Mosikoli na ngai azali na bomoi!”

⁵⁸ Mpe eloko mosusu nini yo oyebi, Yobo? Eloko nini omonaki na emononeli wana? “Mpe na mikolo na suka, Akotelema na mokili. Mpe atako mpambo ekobebisa nzoto na ngai, nzokande kati na mosuni na ngai nakomona Nzambe, Oyo ngai moko nakomona. Ngai nayebi ete Mosikoli na ngai azali na bomoi, mpe Akotelema na mokolo na suka na mokili. Atako makasi na ngai esili nye kati na ngai, atako mpambo ya nzoto ekobebisa nzoto na ngai, nzokande kati na mosuni na ngai nakomona Nzambe.” Na kati wana ezalaki na emononeli ya monene koleka.

⁵⁹ Danyele amonaki Mwanje. Bana ya Baebele bamonaki Mwana na Nzambe. Noa amonaki monama. Abraham amonaki Nzambe, miso na miso. Kasi Yobo amonaki lisekwa, Yobo atalaki na liboso. Ba-tata ya mabota nyonso ná basanto minene, ya Biblia, batalaki na liboso mpo na mokolo wana; na kondimisama moko, na nzela ya bimononeli na bango, na nzela ya bimoniseli na bango, ete ntango moko ya lisekwa ekoya.

⁶⁰ Sikoyo tozali komona misala minene kokóba kosalema. Tozali komona ba-nguya minene ya Nzambe. Tozali komona makambo minene oyo Ye akokaki kosala. Okokaki kotala mói te mpe—mpe óyeba ete ezali nguya ya Nzambe te nde ezali kotambusa mokili yango zingazinga na mói wana. Okokaki te komona eleko ya printemps koya kozanga koyeba ete Nzambe azali. Bokoki komona lobiko ya bakufi miso, bakufi matoi, mpe koyeba ete ezali Nzambe. Kasi bongo soki wana nde nyonso oyo ezalaki, mpe sima na biso kokufa esili mpo na biso? Kasi lisekwa, Pasika, oh, yango nde etiaki elembo na makambo nyonso oyo Nzambe atikálá kolaka, ezalaki lisekwa.

⁶¹ Mpe basengelaki kozala na kobákama na ekulusu, liboso ete bókoka kozwa lisekwa. Mpe liboso Lingomba étikala kozala na makoki ya komona Nguya ya lisekwa, liboso nákoka kutu komona ngai moko lotómo ya sika kosala mosala, liboso ókoka kutu kokota kati na boyokani ya sika elongo ná Nzambe, esengeli moto ye moko amibakisa na ekulusu liboso lisekwa éya. Tosengeli kokufa na makanisi na biso moko, kokufa na ba-nzela na biso moko, kokufa na makambo nyonso oyo ezali zingazinga na biso, koleka kati na mimekano mpe minyoko, ete tókoka komona lisekwa ya sika, Bomoi ya sika. Liboso ete mosumuki ákoka ata kokóma Moklisto, esengeli kufa éya, na sima lisekwa.

⁶² Liboso ete Abraham ákoka komona Elohim, esengelaki mbula ntuku mibale na mitano ya komekama ézala. Liboso ete bana na Baebele bákoka komona Mwana na Nzambe,

esengelaki bákende na litumbu na móto. Liboso ete Danyele ákoka komona Mwanje, esengelaki ákende na libulu na ba-nkosi. Liboso ete Yobo ákoka ata komona lisekwa, esengelaki ákende mpe ábungisa biloko nyonso azalaki na yango; kasi sima nde, na nzela ya emoniseli, amonaki!

⁶³ Mpe soki Yobo na nzela ya emoniseli akokaki kotelema ngwi likolo na elaka, koleka boni esengeli na biso kosala yango, sima na Klisto kosekwa longwa na bakufi mpe kokoma Mbuma ya Liboso kati na baoyo balálá, mpe azongisaki Molimo Mosanto lokola elembo ya elaka, likolo na biso, ete biso mpe tózala na bomoi. “Mpo ete Ngai nazali na bomoi, bino mpe bozali na bomoi!” Komona Bozali na Ye monene katikati na biso, kosala mosala, kosala bilembo yango moko mpe bikamwa oyo Ye asalaki na mokili, kopesa biso bilikya. Mpe tokomi na lisekwa, bongo tótikala likolo na libondo ya putulú na biso? Tika ete tólongwa na libondo ya putulú lelo, ná emononeli ya sika, ná Nguya ya sika, ná mokano ya sika ete tomoni Nzambe kati na Nguya na Ye. Tozomona lisekwa ya makambo koya.

⁶⁴ Tozali na ntango ya kufa. Tozali kofanda na bikuke ya kufa. Bikólo bizali kati na bikuke ya kufa.

⁶⁵ Russie ekundoli ebundeli moko ya sika sikoyo, ndenge bino nyonso boyokaki na radio mpe nyonso. Bazali na ntina ya koya awa te mpe kopanza yango ná bombe. Bakoki kaka komema mwa eloko moko moke awa, mpe kozwa kati na banongi na bango, mpe kopelisa mwa eloko moko ya moke na ekolo moko, mpe bato nyonso bakokoma nzoto paralyisé mpo na ngonga ntuku mibale na minei. Bakoya awa mpe, ntango bino bolamuki, ekozala na moto ya Russie moko oyo ákobeta yo lokolo na mopanzi, engambe mokengeli ya Russie moko ákonza ndako na yo, kozwa mwasi na yo na makasi, kobwaka bana na yo libanda na balabala, mpe kozwa ndako na yo. Bakoki kosala yango. Bakobungisa ata eloko moko te. Bazali na yango. Moto moko te ayabi eloko nini yango ezali. Bomoni, makambo nyonso ezali kokende na molongó. Sikoyo bakoki kosalela yango mpe bazali kobanga yango te, mpamba te moto mosusu te azali na yango.

⁶⁶ Toyebi te ndenge nini ekoya, eloko nini ekosalema. Kasi toyebi eloko moko, ete tofandi likolo ya libondo ya putulú. Ekolo, ezali likolo na libondo ya putulú. Mokili ezali likolo na ya libondo putulú.

⁶⁷ Mpe lokola mokili ezali likolo na libondo ya putulú, nazali na esengo mingi ete Molimo na Nzambe akoki koya, mpe biso tokoki koloba: “Ngai nayebi ete Mosikoli na ngai azali na bomoi, mpe na mokolo ya suka Akotelema likolo na mokili oyo!” Mokolo moko Akoya! Tokokamwa te ete moyemi akomaki:

Na bomoi, Alingaki ngai. Na kufa, Abíkisáki
ngai.
Na kokundama, Amemaki masúmu na ngai
mosíká.
Na kosékwa, Alóngisáki ya mpamba mpo na
libéla.
Mokolo moko Akoya, oo, mokolo oyo ya
nkembo!

⁶⁸ Esengelaki na Getesemani moko, ya matangá ya Makila kobima na lopuso na Ye, liboso na yango. Mpe esengelaki na mpasi ya kufa ya kanza ya Kalvari, liboso ya koya ya bondimisami ya Nzambe ya Seko Oyo akokaki kosekwisa bakufi. Esengelaki na—esengelaki na Getesemani moko mpe Kalvari moko, mpo na kosala Pasika. Esengelaki na yango solo.

⁶⁹ Ndenge bantoma wana, na ntongo wana, ntango balembaki na mitema, kino Petelo alobaki: “Nalembi na motema mpenza, Nabanzi nakozonga na ngai kolóba lisusu. Nakozonga kuna. Na—Namonaki Ye.”

⁷⁰ Bazalaki na bilikia minene, mpe bandimaki mpe makambo nyonso, kino esika ya molili monene wana ekomaki. Nzambe azalaki kosala nini? Azalaki komema bantoma wana likolo na libondo ya putulú. Azalaki komema bango na esika moko epai oyo bakokaki—bakokaki kozala na kondima na bango endimisami epai na bango.

⁷¹ Mpe Petelo alobaki: “Na—Namonaki Ye kosala bikamwa minene kuna na Galilai. Kasi, oh, Ye wana alali kuna na ngambo, akufi, na malili, kati na nkunda! Nabanzi ete nakokende na ngai kaka na mbu na ntongo oyo mpo na kobwáka monyama, mpe nákoba na ngai koloba. Ntango mosusu nakoki kotala na ngambo mosusu ya mbu, mpe nakoyeba. Nazoyeba lisusu ete namonaki Ye ntango Azalaki kozela biso na libongo. Nabanzi nakokende na ngai kaka kuna.”

⁷² Mpe bantoma balobaki: “Boyebi nini? Nabanzi nakokende elongo ná yo.” Oh, bazalaki na mawa mpenza. Balelaki kino miso na bango evimbaki.

⁷³ Ndenge toyebaka koleka mpenza na bisika yango! Toyebi yango mpenza! Bisu nyonso tomesani na makambo yango.

⁷⁴ Nazoyeba lisusu ntango natiaki moko na ngai ya motuya na nkunda kuna, likolo na ngomba kuna, ebengami Eastern, to Malita ya Walnut Ridge. Ndenge natiaki mwa bebe moko kuna! Mpe nakokaki kolela na loboko ya mama, kino, nalelaki kino nakokaki lisusu kolela te. Nasalaki nyonso oyo nayebaki. Kino nazwaki bondóki, komeka komiboma, nazalaki koleka kati na ntango moko makasi mpenza. Mpe ezalaki na ngonga wana, na kati na mwa eteni ya ndako kuna, nafukamaki na mabolongo, nde Likolo efungwamaki lisusu, mpe namonaki ye kotelema wana kati na bongengi ya kozanga kufa. Ezalaki na ngonga

wana nde nayokaki maboko na ye zingazinga na mapeka na ngai, alobaki: “Bill, ozososola te. Bisu tozali malam u mpenza koleka yo.”

⁷⁵ Bomoni, esengelaka kobakama na ekulusu. Esengelaka kofinama ya folólo, mpo na kobimisa malasi longwa na yango. Esengelaka konyatama ya bomoi moko, mpo na kobimisa oyo eleki kitoko mpenza longwa na oyo ezali. Yango nde ntina esengelaki Yesu áfinama, mpo na kobimisa oyo Ye azalaki. Akokaki kotelema te liboso ya kobakama na ekulusu, koloba: “Nguya nyonso na Likolo mpe na mabelé epesami na loboko na Ngai.” Kasi sima ya kobakama na ekulusu, Akokaki kotelema mpe koloba ete, “Nguya nyonso na Likolo mpe na mabelé epesami na loboko na Ngai!” Kasi yango esalaki nini? Esengelaki kobakama na ekulusu liboso.

⁷⁶ Esengelaki kobukama mpe mpasi ya motema mpo na bantoma. Bamonaki Mobikisi na bango, Oyo bango balingaki, mpe bamonaki kutu Ye kosekwisa bakufi longwa na—longwa na nkunda. Bamonaki Ye kosala yango. Na bongo bakanisaki: “Ye wana alali kuna, na malili, kati na nkunda, Ye moko, na ntongo oyo.” Esengelaki ba . . .

⁷⁷ Bato wana oyo bamonaki Ye kofungola miso ya bakufi miso, bamonaki Ye kotelema wana mpe koyeba makanisi mpenza oyo ezalaki na mitema ya bato, “Ndenge nini Ayebaki te,” bakokaki koloba, “ete bato yango bazalaki koya sima na Ye? Ayebaki ndenge nini? Mpo na nini Ye azangaki koyeba Yuda, ete Yuda ako—akokaba Ye? Mpo na nini Ayebaki te ete basoda bazalaki koya na likolo na ngomba kuna, ná mangenda ná mipanga mpe biloko nyonso, mpo na kokanga Ye, soki Ye akokaki koyeba makanisi na bango?”

⁷⁸ Bomoni, zabolo azalaki kosalela bango, kotia bango likolo na libondo ya putulú, mpamba te balingaki kopesa bango litatoli ya “Ngai nayebi.” (Ezali te “Nabanzi” to “ntango mosusu ezali bongo.”) “Ngai nayebi! Ngai nayebi!”

⁷⁹ Mpe bómikanisela, mimekano yango eyaka likolo na bino na motindo yango moko, mpo bóloba te ete: “Malamu, ntango mosusu Oyo ezali malam u, ntango mosusu Makomi ezali solo, ntango mosusu lobiko na nzoto kati na Bonzambe ezali solo, ntango mosusu Molimo Mosanto azali solo.” Kasi ntango obiki makambo wana mpe obimi na libondo ya putulú wana, mpe ozwi emoniseli ya Nzambe, na nzela ya libatizi na Molimo Mosanto, okoki kogánga, “Ngai nayebi ete Mosikoli na ngai azali na bomoi, mpamba te azali kobika kati na ngai!”

⁸⁰ Petelo alobaki: “Nakokende kolóba.” Bantoma balobaki: “Nandimi ete nakokende elongo ná yo.” Boye bazalaki likolo na libondo ya putulú na bango, kuna na katikati na mbu, mpe mokakatano ezalaki na nzela. Mpe nakoki koyoka moko na bango koloba: “Oh, ekokaki kosalema ndenge nini, Petelo?”

Ndenge nini ekokaki kosalema ete Moto lokola oyo wana akokaki kokufa? Ndenge nini Akokaki kotiyama kati na nkunda ndenge Atiamaki? Ndenge nini Akokaki koyika mpiko kotika bango kobwakela Ye nsoi na elongi mpe kobenda mandefu, kotia motole wana likolo na motó na Ye? Ndenge nini Akokaki kosala yango, oh, mpe kokoba kozala Nzambe? Nazokoka kaka kososola yango te.” Oh, mpasi nini oyo na motema!

⁸¹ Mpe na mbala moko, batalaki na ngambo na libongo, kaka lolenge ya emoniseli yango moko oyo Yobo azwaki, kuna bamonaki oyo Yobo amonaki mibu nkoto minei liboso. Mosikoli atelemaki wana, na bomoi mpe ya sika, ateleme na libongo. Ná moto ya kopela, mpe mbisi ebelisami likolo na yango ndenge wana, mpe alobaki, abengaki bango.

Yesu azali na mesa etandami
 Epai wapi basanto na Nzambe bazali
 koleisama,
 Azali kobenga baponami na Ye “Bóya kolia
 bilei ya mpokwa;”
 Azali koleisa ná mana na Ye
 Mpe kokokisa bosenga nyonso;
 Oh, ezali, kitoko kolia elongo ná Yesu ntango
 nyonso!

Ndenge mpenza tokoki kokanisa yango, ndenge mpenza esengelaki na makambo minene wana!

⁸² Ndenge nini. . .ntoma Paulo, ntoma monene wana, oyo alekaki na ntango na ye ya mokakatano ntango azalaki motatoli na kufa ya Setefano; mpe amonaki mwa elongi na ye kotala na Likolo, mpe mabanga kobeta ye na elongi, mpe atalaki likolo mpe alobaki: “Namoni Likolo lizipwi. Namoni Yesu kotelema na loboko ya mobali ya Nzambe.” Alobaki: “Nkolo, tangela bango lisumu oyo te.” Mpe Paulo oyo asimbaki bilamba yango, likambo yango etiaki ye ba-mposo ná ba-mposo likolo na libondo ya putulú, kotambola-tambola kokende kozonga; kino, makanisi na ye ebebisamaki, kino azalaki na nzela na ye na Damaseke, komeka komilongola na makambo yango, lokola moto moko oyo azali komibondisa na molangi ya whiskey, komeka kosilisa bolozi na ye.

⁸³ Azalaki na katikati na yango, ntango Mongongo moko longwa na Likolo, Pole monene ya kongenga elobaki: “Saulo, Saulo, mpo na nini ozali konyokola Ngai?” Amonaki Ye. Ayebacki Ye, ete Azalaki Yesu oyo asekwaki, Ye oyo azalaki motatoli na kufa, asekwaki lisusu.

⁸⁴ Oh, nakoki kokanisa lisusu bomoi na ngai moko, kuna na nzela ya libebi, ntango nayokaki Mongongo ya bopolo: “Ngai nazali Yesu. Nakufaki, Nazali na bomoi mpo na libela. Mpo ete Nazali na bomoi, yo mpe okoki kozala bomoi.” Bandá ntango wana, kotia loboko na ngai na oyo ya Ye, natielaki Ye motema

kati na bisika ya molili. Wana ntango ekokoma epai wapi nakoki komona te, nzela nini nazali kokende, nazali kaka kotiela Ye motema.

⁸⁵ Moklisto mondimi nyonso asengeli kopusama kati na mimekano wana. Moklisto mondimi nyonso asengeli kotiyama likolo na libóndo ya putulú, mpo ete ákoka kobima na likambo oyo abikelá, “Ngai nayebi ete Mosikoli na ngai azali na bomoi!”

⁸⁶ Toyei awa na ntongo oyo te bobele mpo na kofanda mpe kosolola na ntina na likambo moko eleká kala, oyo ezali nyonso solo, kasi toyei awa na litatoli na ntongo oyo, “Nayebi ete Yesu Klisto azali Mwana na Nzambe, nayebi yango na ntembe ata moke te! Nayebi ete asekwí longwa na bakufi, mpe azali kobika kati na ngai lelo. Azali wa ngai mpe ngai nazali wa Ye. Nazali mosangoli na libula elongo na Ye, kati na Bokonzi na Nzambe.”

⁸⁷ Pasika! Pasika ememaka eloko monene, lisekwa, elikia ya sika. Osili kozwa yango na ntongo oyo? Ezali na motema na yo? Oyebi nde ete Mosikoli na yo azali na bomoi, mpe Azali kosala ete makambo nyonso étambola elongo?

⁸⁸ Okoloba: “Ndeko Branham, nafandi awa, kozela molongo ya mabondeli.”

⁸⁹ Nzambe azali kosala yango mpenza mpo na bolamu. Mpo na nini elenge mwana mobali ya motuya wana, mokolo mosusu wana, ná miso ekufá ntango abotamaki? Ete Nzambe akoka kozwa nkembo mpe ákomisa engumba na mobulungano. Iyo, Nzambe ayebi oyo Azali kosala. Nzambe ayebi. Mpe Azali kotia biso na libóndo ya putulú, mpo na kolakisa biso nkembo na Ye.

⁹⁰ Boye, na ntongo oyo nazali koloba boye, moninga. Sima na mibu ntuku misato na moko ya mosala, sima na mibu ntuku misato na moko ya mosala na elanga, nalingi kopesa litatoli na ngai na likambo oyo. Nasilá komona masundoli. Nasilá koleka na ngonga oyo nasengaki biloko, nalelaki mpo na kozua biloko, mpe nalómbaki mpo na biloko yango, kasi nazangaki kozwa yango. Kasi soki nakobi kaka kotalela Nzambe na motema molai, bongo nde nayebaka ete ezotambola malamú, esukaka mpenza malamú, esalaka mpenza likambo oyo esengeli.

⁹¹ Ntango nabungisaki bebé na ngai, Sharon na ngai moke, na . . . oyo wana ezalaki likambo moko oyo ebetisaki ngai libaku. Nalobaki: “Ndenge nini likambo yango ekoki kozala mpo na bolamu? Ndenge nini ekoki kozala mpo na bolamu?” Mpe sima na ba-sánzá, ntango namonaki ye kotelema wana na kitoko nyonso ya elenge mwasi, kosololáká ná ngai, atelemaki pembeni ya likalo wana ya kala oyo ebukáná, kuna, nayebaki ete soki ázalaka na bomoi, akokaki ntango mosusu kotambola mabe. Nzambe asengelaki kozwa ye wana azalaki naino na bopete mpe bopolo. Nayebi ete nakomona ye lisusu. Nayebi ete nakomona ye, nayebi yango na ntembe ata moke te.

⁹² Nakanisi na ntina na mwasi na ngai ya mibu ntuku mibale na mibale, oyo alongolamaki, azalaki naino mpenza elenge mwasi, mama moke moko kuna. Ntango ba-zulunale epesaki nsango awa, “Elenge mama moko, reverend . . . , auti kokufa,” oh, ndenge motema na ngai etangaki makila! Nayebaki eloko nini ya kosala te.

⁹³ Kasi lelo, nayebi ete nyonso ezalaki kosala mpo na bolamu na ngai. Nayebi ete bomoi esengelaki kotiyama na mabele, mpe kokamolama, kofinama, kobimisa oyo ezalaki kati na yango. Ezalaki na Branham mingi mpenza na kati kuna, esengelaki ákámolama liboso ete Nzambe ákoka komitalisa Ye moko.

⁹⁴ Ezalaki na makambo mingi mpenza oyo ya yo kati na yo, kino Nzambe asengelaki kofina yango ébima, na nzela ya mimekano. Mpe ntango kofinama wana ezalaki kosalema, ezalaka mpasi. Kasi sima na mwa ntango, likolo ekomi polele, na bongo okomona mwango na Nzambe. Bongo okogánga, “Ngai nayebi ete Mosikoli na ngai azali na bomoi, mpe na mikolo ya suka Akotelema na mokili! Ata nkusú elei nzoto oyo, ata bongo na mosuni na ngai, nakomona Nzambe!” Mimekano mpe makambo mike mike oyo ezali kaka mpo na ngonga moke, ekolimwa mpe ekoleka. Kasi ezali kosalema bobele mpo na bolamu na yo, tóbosana yango te, ete Nzambe akozwa nkembo.

⁹⁵ Tika ete tógúmba mitó na biso mpo na ngonga moke. Nalingi kotuna, liboso na libondeli, ezali na moto moko awa oyo akolinga ete bákánisa ye na libondeli liboso tósukisa? Nzambe ápambola bino. Bato boni bazali awa bakolinga koloba, “Nalingi ete Nzambe, na ntango ya momekano na ngai sikoyo, ápesa ngai kobikela makambo ya sika, ete nákoka kokóma ya sika lisusu?” Tombola loboko, loba, “Nalingi—nalingi ete oyo ézala lisekwa mpo na ngai, Pasika, kosekwisa ngai na bilikia ya sika mpe na ba-nguya ya sika, bokólóngónu ya sika mpe esengo ya sika.” Nkolo ápambola bino, balingami na ngai.

⁹⁶ Oh, Nzambe na biso mpe Mobikisi na biso, tozongisi matondi mingi epai na Yo mpo na Pasika oyo, mpo na oyo yango elingi koloba na mitema na biso. Mpe na kondima, kuna na ngambo ya mokili, tokoki komona Boyei na Nkolo, Yesu, wana Azali komilengela sasaipi, kolata bilamba na Ye ya bokonzi. Mpe, Lingomba ezali kolata, Mobali na Libala azali kolatisa Yemwasi molato ya libala. Bokutani monene ebelemi kosalema kala mingi te.

⁹⁷ Libondo ya putulú oyo ekoumela mpo na libela te. Ntango tozali koyoka bato koseka, kotiola biso, mpe kobenga biso na ba nkombo wana ya kobetisa libaku ya “batúntuki,” mpe kotiola biso, koloba ete tozali makanisi ya motó na biso ezali ata malamumu te, oh, ekoki koumela ntango nyonso te, Nkolo. Kasi tika ete tózala lokola Yobo, tósimba litatoli na biso, tika ete tózala lokola

Daniele na libulu ya bankosi, to bana na Baebele na litumbu na móto, to Abraham kati na mobembo na ye.

⁹⁸ Sunga biso, O Nkolo, kotelema sembo kino tókomona eloko monene wana kosalema, “Ntango kelelo ekoyula, mpe bakufi kati na Klisto bakosekwa; biso baoyo tozali na bomoi mpe baoyo totikali tokobongwana, na ntango moke, na kobweta ya liso.” Na bongo Pasika wana ekoya mpo na biso, oyo Klisto asepelaki na yango eleki mibu nkóto moko na nkama libwa na ntongo oyo, mpe alobaki, “Mpo ete Ngai nazali na bomoi, bino mpe bozali na bomoi.”

⁹⁹ “Yesu oyo moko, oyo akamatamaki longwa na kati na biso, akozonga bobele na motindo Akendeki.” Tokomona Ye, ata elembo moko na moko ya mpota na loboko na Ye mpe bilembo ya nzube nyonso oyo etiamaki na motó na Ye. Tokomona Ye.

Oh, nakoyeba Ye, nakoyeba Ye,
Mpe mosikolami nakotelema pembeni na Ye.

¹⁰⁰ Iyo, Nkolo, motema na ngai ya mawa, wana nzoto na ngai oyo ya bolembu, ebandi kogumbama na nse ya bozitó, mitungisi mpe mikakatano ya bilanga ya kobuka mbuma, bilanga ya mosala, bisengo mpe bampasi, kotiolama ya batei na lofundu, mpe bongo na bongo, na bisika ndenge na ndenge, ná koseka ya bato, mpe ba-nguya mabe. Kasi, O Nkolo, mokolo moko, tokokita lokola Eliya, kuna na ebale; tokotala na ngambo kuna, ekangami na matiti nyonso, likalo ya móto oyo ekomema biso. Tika ete tóyeba ete mabondo ya putulú oyo ezali kaka bizipelo oyo ezali kopekisa biso komona eloko monene yango oyo ezali kozela liboso na biso, nkembo monene wana.

¹⁰¹ Tika ete tótikala sémbó lokola Yobo, kino tokomóna Ye, miso na miso. Tika ete tózala mpenza sembo lokola Nkolo na biso, lokola ndakisa na biso, mpo na kokende na Kalvári ko. . . kobelema mpo na kobákama na ekulusu, mpe kobakama na ekulusu elongo ná Ye, mpo ete lisekwa ékoka kozala na bomoi na biso. Kokisa yango, Nkolo.

¹⁰² Tika ete, soki ezali na basekiseki awa, oyo bazali pelamoko Paulo ya kala, oyo azalaki kotiola, tika ete bázwa Pasika na nzela na bango ya kozonga na ndako na ntongo oyo. Kokisa yango, Nkolo.

¹⁰³ Tobondeli, Nkolo, ete baoyo bazali likolo na libondo ya putulú ya libebi, libondo ya putulú ya bokono, ete oyo ézala ngonga oyo bakokangolama.

¹⁰⁴ Lobi na mpokwa, wana nazalaki kosolola ná mwasi moke yango na ndako ya motuka, ná mobali na ye; ndenge kuna na Phoenix, na mpasi makasi, mpe ba-cancer minene wana na nzoto na bango, kasi lelo na ngonga oyo azali malamú mpenza mpe abiki. Mpe bebé moke oyo esengelaki balongola motema na ye, afandi awa na ndako na ntongo oyo, mobimba, malamú. Elenge mwana mobali ya lolándá oyo kalakala azalaki kotambola kati

na molili mpe atikálá komona pole ya moi te, azotambola lelo mpe azomona pole ya mokolo. Mpe, O Nzambe, ndenge totondi Yo mpenza mpo na likambo oyo! Mpe nyonso ezali kotala na ngambo ya ezipelo, na mokolo monene wana ya lisekwa. Kokisa yango, Tata. Mpe tika ete báyeba ete makambo oyo esengelaki ezala ndenge wana, ete: mwana mobali moke oyo ya lolándá ákoka komona, ete mwana moke oyo azalaki na bokono ya motema ákoka kopesa litatoli epai na basusu. Makambo nyonso oyo etambolaka elongo mpo na bolamu ya baoyo balingaka Yo.

¹⁰⁵ Nyonso epesami makoki epai na biso mpo ete Moko azalaki na botosi kati na komekama, ezalaki na Moko Oyo ayikelaki komekama mpiko, ezalaki Yesu nde. Moko Oyo azalaki mpenza na botosi epai na Tata, kino Tata asekwisaki Ye na ntongo ya Pasika, mpo ekokaki kosalema te ete Ákangama na kufa. “Zambi Nakotika Mobulami na Ngai komona kopola te, mpe Nakotika bomoto na Ye na ewelo te.” Mpamba te, Azwamaki sembo, ntango nyonso kosaláká oyo esepelisaki Tata.

¹⁰⁶ Nzambe, tika ete tózala ntango nyonso sémbó na esika ya mosala. Ata komekama na biso ezali nini mpe mitungisi na biso, ata soko nini, tika ete tókoka koloba, ntango nyonso ete, “Nayebi ete makambo nyonso etambolaka elongó mpo na bolamu ya baoyo balingaka Nzambe.” Kokisa yango, Tata.

¹⁰⁷ Topamboli bato oyo na ntongo oyo na mapamboli na Yo. Bayaki liboso ya ntango uta na bisika na bango, bayaki na mongombo oyo. Bayaki kozwa libondisi. Tika ete bázonga na ndako na ntongo oyo, ná Nguya ya Molimo Mosantu kopela kati na mitema na bango, wana bazali kotambola na nzela lokola baoyo bautaki na Emaus, koloba ete: “Mitema na biso ezalaki kopela kati na biso te, wana ezalaki Ye kosolola na biso na nzela?” Kokisa yango, Tata. Napesi bango epai na Yo sasaipi, na Nkombo na Nkolo Yesu Klisto. Amen.

Malamu, Ndeko Neville. Boye sikawa bóbosana mayangani te.

¹⁰⁸ Tokozala na bakalati ya mabondeli na ntongo oyo te, mpamba te, soki tozali na bakalati ya mabondeli, ntango nyonso oyo nakozala na bato kotelema awa ndenge wana, nakozala kaka kotalela likabo wana. Nasengeli kozala na esika moko oyo nakoki kotia yango pembeni, epai wapi nakoki kobima awa mpe nakoki...nazobanga. Nazomonana lokola nazobanga, mpe nazobanga ete násála libunga. Kobungisa etumba moko, ezali kobungisa etumba mobimba te. Patton abungisaki bitumba ebele, kasi atikálá kobungisa etumba mobimba te. Ezali solo. Bisó mpe lokola tokobungisa bitumba mingi, kasi tokobungisa etumba na mobimba te. Nakosala mabunga mingi, kasi nakobungisa Ntina te. Nzambe apesaki yango, mpe Nzambe akobatela yango. Ezali—ezali epakweli. Mpe ntango ekoki, nandimi ete ngonga ekomi, mpe nazobanda, lokola

ezali Pasika mokolo oyo, nalingi kokende—kokende ndenge nasalaki kuna kobondela mpo na babeli. Mpe soki nakokoka . . . Ezali epakweli. Ezali eloko moko oyo esengeli kosalema kati na ngai. Nameseni mpenza na yango te. Eyaka na lolenge moko boye, ntango mosusu nakokoka koyeba yango mpenza malamumu te, kasi esengeli na ngai kokoba kokende liboso kino náyeba yango mpenza mbala nyonso. Bongo oyo ekozala mokolo oyo nakomeka, na ngolu na Nzambe.

¹⁰⁹ Nkolo ápambola bino sikawa. Ndeko Neville. Mpe mayangani ekobanda na ngonga ya libwa na ndambo ya ntongo. Ndeko Neville.



NGAI NAYEBI LIN60-0417s

(I Know)

MILONGO YA MATEYA YA PASIKA

Liteya ya Ndeko William Marrion Branham oyo, eteyamaki liboso na Anglais mokolo mwa Lomingo na ntongo ya Pasika na kobima na moi, 17 sanza ya minei, 1960, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org